

XII

Lai cheûyainne piaînnatte était haibitèe poi ïn boiyou. Çt' envèllie feut brâment couétche, mains elle piondjé lo ptét pŕince dains ènne grante grie :

- Qu' ât-ce que t' faîs li ? qu' è dié â boiyou, qu' è trovè ïnchtallè en coidge (*silence*) dvaint ènne

coullècchion de botoiyes veûdes èt ènne coullècchion de botoiyes pieïnnes.

- Í bois, réponjé l' boiyou, d' ïn ludyubre djait.
- Poquoi ât-ce que t' bois ? yi dmaindé lo ptét pŕince.
- Po rébiaie, réponjé l' boiyou.
- Po rébiaie quoi ? dmaindé lo ptét pŕince qu' lo piaînjait dje.
- Po rébiaie qu' i aî voïrangne (*honte*), aïvoué l' boiyou en béchaint lai tète.
- Voïrangne de quoi ? s' aïvijé lo ptét pŕince qu' lo vlait chcouéri.
- Voïrangne de boire ! aïch'vé l' boiyou qu' s' ençhoûjé po aidé dains lai coidge.

Èt lo ptét pŕince s' en allé, maîy'nou (*hésitant*).

Les grantes dgens sont déchidément bïn, bïn b'jairres (*bizarres*) qu' è s' diait en lu-meinme di temps di voiyaidge.